

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 32/5

8 նոյեմբերի 2016թ.

Քննարկվեց Ա/Ձ Գարիկ Գևորգյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 26.09.2016թ. թիվ 1008/03 որոշման դեմ:

Ա/Ձ Գարիկ Գևորգյանի գանգատում բերված փաստարկները.

Ա/Ձ Գարիկ Գևորգյանը (այսուհետ նաև՝ գանգատաբեր) հայտնում է, որ 2000 թվականին որպես անհատ ձեռնարակտեր զբաղվել է տաքսու ծառայությունների մատուցմամբ, աշխատել է մեկ-երկու տարի, այնուհետև կատարել է հարկային ամբողջ պարտավորությունները: Իր կողմից վճարվել են նաև թույլտվության համար նախատեսված գումարները: Երբ գանգատաբերին տեղեկացրել են, որ լիցենզիայի համար նախատեսված պետական տուրքը՝ 25.000 դրամ չի մուծել, նա ներկայացրել վճարման կտրոնը: Սակայն, քանի որ վճարված գումարը համապատասխան հաշվեհամարին մուտք չի եղել, նա այցելել է ՀՀ ֆինանսների նախարարություն և գրել է դիմում: Պատասխան գրությամբ հայտնվել է, որ վճարման վերաբերյալ տեղեկության օրինակը ուղարկվել է հարկային տեսչություն:

Ներկայումս իր նկատմամբ հաշվարկվել են պարտավորություններ, որոնք հայտնի չէ, թե ինչպես են առաջացել: Գանգատաբերը հայտնում է նաև, որ իր մեքենան մինչ օրս վթարված է և չի շահագործվում, ինչպես նաև, որ չի աշխատել:

Ելնելով վերոգրյալից՝ գանգատաբերը խնդրում է չեղյալ համարել 26.09.2016թ. թիվ 1008/03 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննարկելով Ա/Ձ Գարիկ Գևորգյանի վերաբերյալ վարչական վարույթի նյութերը պարզել է, որ համաձայն հարկային մարմնում առկա անձնական հաշվի քարտի տվյալների 24.08.2016թ-ի դրությամբ նրա չկատարված հարկային պարտավորությունները կազմում են 597.639 դրամ: Մասնավորապես, պետական տուրքի գծով պարտավորությունը կազմում է 360.373 դրամ (48.700 դրամ ապառք, 311.673 դրամ տույժ), որն առաջացել է 2012-2013թ.թ. պետական տուրքի գումարներից:

Հաստատագրված վճարի գծով պարտավորությունը կազմում է 30.351 դրամ (տույժ), որն առաջացել է 15.07.2009թ-ից:

Սոցիալական ապահովության վճարի գծով պարտավորությունը կազմում է 206.915 դրամ, որն առաջացել է 2011թ. փետրվարից մինչև 2012թ. դեկտեմբեր ամիսն ընկած ժամանակահատվածում սոցիալական ապահովության նվազագույն գումարները չվճարելու հետևանքով:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ԿԱ ՊԵԿ աշխատակազմի իրավաբանական վարչության պետի կողմից 26.09.2016թ-ին ընդունվել է թիվ 1008/03 որոշումը (այսուհետ նաև՝ Որոշում) Ա/Ձ Գարիկ Գևորգյանից 597.639 դրամ պարտավորության գումար գանձելու մասին:

Պետական տուրքի գծով առաջադրված պարտավորությունների վերաբերյալ՝ ընդհանուր գումարով 360.373 դրամ, հարկ է նշել հետևյալը.

Ա/Ձ Գարիկ Գևորգյանի կողմից 17.04.2009թ. ստացվել է մարդատար տաքսի ուղևորափոխադրումներ կազմակերպելու վերաբերյալ թիվ ՏԾ 00653 լիցենզիան, որի համար պետական տուրքի գծով առաջին վճարումը կատարվել է լիցենզիան տրամադրվելու պահին:

Ըստ հարկային մարմնում առկա տվյալների, նշված լիցենզիայի համար պետական տուրքի գծով վճարումներ 2010թ. և 2013թ. համար չեն կատարվել, ինչը և հիմք է հանդիսացել պետական տուրքի գծով հաշվարկված պարտավորությունները գանձման առաջադրելու համար:

Նիստի ընթացքում Ա/Ձ Գարիկ Գևորգյանը հայտարարեց, որ իր կողմից սահմանված ժամկետներում վճարվել են վերոգրյալ լիցենզիայի համար նախատեսված պետական տուրքի գումարները: Ա/Ձ Գարիկ Գևորգյանը հայտնեց նաև, որ պատրաստ է ներկայացնել նշված փաստը հիմնավորող համապատասխան ապացույցները՝ գումարների վճարման անդորրագրերը: Սակայն լրացուցիչ որևէ ապացույց Ա/Ձ Գարիկ Գևորգյանի կողմից չի ներկայացվել:

Սոցիալական ապահովության վճարի գծով պարտավորությունը կազմում է 206.915 դրամ, որն առաջացել է 2011թ. փետրվարից մինչև 2012թ. դեկտեմբեր ամիսն ընկած ժամանակահատվածում սոցիալական ապահովության նվազագույն գումարները չվճարելու հետևանքով: Այս կապակցությամբ հարկ է նշել, որ մինչև 31.12.2012թ. գործող «Պարտադիր սոցիալական ապահովության վճարների մասին» ՀՀ օրենքի 5-րդ հոդվածի 5-րդ մասի համաձայն, անհատ ձեռնարկատերերը պարտավոր են յուրաքանչյուր ամսվա համար վճարել նվազագույն սոցիալական վճար՝ 5000 դրամի չափով, մինչև հաջորդ ամսվա 15-ը: Ընդ որում, պետական գրանցման վկայականը ժամանակավոր հարկային մարմին հանձնած (մինչև 25.07.2012 թ-ը) և այդ ժամանակահատվածում ձեռնարկատիրական գործունեություն չիրականացրած անհատ ձեռնարկատերը նվազագույն սոցիալական վճարներ չի կատարում՝ վկայականը հանձնելուն հաջորդող ամսվանից մինչև վկայականը հետ ստանալու ամիսն ընկած ժամանակահատվածի համար:

Դա նշանակում է, որ անհատ ձեռնարկատիրոջ կողմից պետական գրանցման վկայականը ժամանակավորապես հարկային մարմին հանձնած չլինելու դեպքում անհատ ձեռնարկատերը պարտավոր էր վճարել 5000 դրամ նվազագույն սոցիալական վճար՝ անկախ ձեռնարկատիրական գործունեություն իրականացնելու կամ չիրականացնելու հանգամանքից:

Քննարկվող դեպքում Ա/Ձ Գարիկ Գևորգյանի կողմից պետական գրանցման վկայականը ժամանակավորապես հարկային մարմին չի հանձնվել, ինչը և հիմք է հանդիսացել նվազագույն սոցիալական վճարի գծով պարտավորությունների հաշվարկման համար:

Ինչ վերաբերվում է հաստատագրված վճարի գծով գանձման առաջադրված պարտավորությանը՝ գումարով 30.351 դրամ, ապա այն հաշվարկվել է Ա/Ձ Գարիկ Գևորգյանի կողմից հաստատագրված վճարի վերաբերյալ ներկայացված հայտարարագրում արտացոլված հաստատագրված վճարի գումարը ՀՀ օրենսդրությամբ սահմանված ժամկետում չվճարելու համար:

Ելնելով վերոգրյալից՝ Հանձնաժողովը գտնում է, որ Որոշմամբ պարտավորությունները գանձման են առաջադրվել ՀՀ օրենսդրությամբ սահմանված կարգով, դրանք հիմնավոր են և ենթակա են կատարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

ՀՀ ԿԱ ՊԵԿ աշխատակազմի իրավաբանական վարչության պետի 26.09.2016թ. թիվ 1008/03 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ



Վ.ՄԻՐՈՒՄՅԱՆ